

Wanita Islam dengan Soal Poligami

(sambungan Qalam bilangan 211)

Cemburu, merajuk, iri hati dan sikap berlawanan di antara satu sama lain adalah sifat-sifat semula jadi kaum wanita yang sangat susah hendak dihapuskan. Sifat-sifat ini bukan sahaja didapati pada jiwa kaum wanita biasa, malahan isteri-isteri Nabi yang mendapat gelaran “*Ummahāt al-Mu'minīn*” juga memiliki sifat-sifat yang sedemikian rupa. Bacalah makalah ini seterusnya! –P.

(Oleh: Ummu Muhsin)

Alam Wanita

Berkorban di samping suami.

Siti Khadijah pula bukanlah merupakan seorang janda yang lincah, mudah dapat dipengaruhi oleh sebarang lelaki muda, bangsawan dan hartawan yang berniat serong terhadap diri dan kekayaannya, tetapi ia adalah seorang ibu yang telah menempuh banyak pengalaman di lapangan hidup, yang telah puas mengharungi samudera, melanda gelombang kehidupan di maya pada ini. Ia telah masak dengan tabiat manusia yang berada di sekeilingnya. Sebelum itu ia sudah pun dua kali bersuami, dan kedua-dua bekas suaminya itu adalah dari kalangan orang-orang bangsawan Quraisy, ia juga telah beberapa banyak berkenalan dengan lelaki yang lain sewaktu mereka bertugas menjalankan perniagaannya ke negeri Syam pada setiap tahun.

Tetapi dengan Muhammad baru sekali inilah sahaja ia berkenalan, sejak Muhammad bertugas buat pertama kali membawa barang-barang dagangannya ke negeri Syam.

Dengan sekali pandang ia telah dapat menyelami tabiat kejujuran Muhammad, ia dapat melihat sifat amanah yang tersemat dijiwanya, yang mana dengan sert-merta ia tertarik hati kepada

anak muda Quraisy yang budiman itu. Ia lantas bercita-cita untuk menjadikan Muhammad sebagai suaminya yang terakhir, sekalipun ia mengetahui bahawa Muhammad seorang anak yatim piatu yang bukan dari golongan hartawan yang memiliki harta kekayaan yang dibanggakan oleh masyarakat Quraisy di zaman itu. Ia mengerti Muhammad seorang fakir yang hidup sederhana, menutupi sara hidupnya dengan menggunakan tulangnya yang empat kerat, tetapi ia memiliki seketul hati yang suci bersih, hati yang belum pernah dinodai oleh kekotoran masyarakat yang berada di sekelilingnya. Sifat-sifat inilah yang menarik hati janda kaya itu sehingga rela sehidup semati dengan Muhammad.

Lima belas tahun lamanya Siti Khadijah hidup di samping Muhammad sebagai isteri yang menumpahkan sepenuh taat setianya, sebelum ia diangkat oleh Allah *Subḥānahu wa Ta'ālā* menjadi Rasul pilihan-Nya. Tegasnya

Muhammad pada masa itu sebagai manusia biasa. Lima belas tahun adalah suatu masa yang agak lama bagi seorang isteri menguji sifat-sifat kejujuran atau kecurangan yang ada tersimpan di dalam peribadi seorang suami. Tetapi bagi Khadijah masa yang begitu lama hanya dirasanya sebagai suatu masa yang terlalu singkat. Ini disebabkan suasana aman, damai dan tenteram sentiasa menglubungi rumah tangga suami isteri yang bahagia itu. Dengan ini semakin sehari semakin tambah mendalamlah perasaan kasih mesra Siti Khadijah terhadap Saiyidina Muhammad *salla Allāhu 'alayhi wa sallam*, oleh itu tidaklah hairan sewaktu Saiyidina Muhammad telah diangkat menjadi seorang Rasul Pilihan Tuhan, untuk menentang segala kemungkaran yang dilakukan oleh masyarakat Quraisy diseluruh semenanjung Tanah Arab, maka Siti Khadijahlah di antara orang yang pertama mempercayai agama suci yang dibawa oleh Saiyidina Muhammad dan

Alam Wanita...

dengan tidak ragu-ragu lagi ia lantas menyerahkan ke semua harta kekayaannya kepada suaminya sebagai suatu pengorbanannya yang terbesar terhadap agama Allah yang mulia, inilah sebabnya sebaik-baik sahaja Siti Khadijah menerima berita yang menakjubkan atas perlantikan Saiyidina Muhammad menjadi Rasul bagi umat manusia di akhir zaman ini dengan perantaraan wahyu daripada Allah yang disampaikan oleh malaikat Jibril di Gua Hira', pada ketika itu juga ia mengeluarkan segenap rasa hatinya dengan bersungguh-sungguh dan penuh keyakinan, ujarnya " . . . Demi Allah! Tuan tidak akan dikecewakan Allah buat selama-lamanya . . . "

Demikianlah suatu pengakuan yang telah diberikan oleh seorang isteri yang taat setia kepada suaminya, setelah ia bercampur gaul dan berkesedudukan dengannya dalam suatu masa yang sebeginu lama. Pengakuan ini sesungguhnya telah memberi suatu penjelasan kepada kita akan beberapa gambaran tentang peribadi Muhammad sebagai seorang lelaki sebelum dan sesudah ia diangkat menjadi seorang Rasul. Pengakuan tegas yang telah diberikan oleh Siti Khadijah ini telah disokong pula dengan pengakuan yang lain datangnya dari Saiyidina Ali bin Abi Talib sebagai seorang keluarga yang terhampir (sepupu) kepada Saiyidina Muhammad yang telah hidup serumah dengannya sejak dari kecil.

Ujar Ali:

" . . . Muhammad adalah seorang yang sangat pemurah dan sentiasa terbuka tangannya, berani hatinya, benar tutur katanya, lemah-lembut sikapnya dan baik pergaulannya. Barang siapa yang memandangnya akan bersegera menghormatinya dan barang siapa yang bergaul dengannya akan terpikat hatinya dan jatuh kasih kepadanya."

Hanya Siti khadijah seorang sahajalah di antara isteri-isteri Nabi yang telah dapat mengenali dengan sedalam-dalamnya akan sifat-sifat Muhammad sebagai seorang suami yang benar-benar mempunyai tanggungjawab terhadap rumah tangganya dari sejak ia sebelum diangkat menjadi seorang Rasul.

Suami yang adil:

Apabila kita melangkah lebih jauh meninjau pergaulan isteri-isteri Nabi yang lain, yang telah datang menduduki rumah tangga beliau kemudian daripada Khadijah, sudah tentu agak sukar bagi sesiapa yang hendak mengenal dengan jelas akan cara hidup mereka di rumah itu. Sebab isteri-isteri yang lain itu tidak begitu pakar untuk memahami cara hidup Rasulullah sebagai seorang suami dan sebagai seorang nabi, yang sentiasa berhati jujur ikhlas, memandang sama rata terhadap kesemua isteri-isterinya itu. Kerana sifat semula jadi bagi seseorang wanita itu muhu ia dilebihkan dari yang lain, sama ada dalam jurusan pergaulan, nafkah dan kasih sayang. Oleh yang demikian itulah perasaan iri hati dan cemburu di antara satu sama lain

tak dapat mereka elakkan. Muhammad sebagai seorang Rasul yang bersifat adil dan saksama terhadap isterinya, itu sudah tentu tidak dapat melayan kehendak-kehendak mereka yang mirip kepada berat sebelah dan ketiadaan adil itu.

Kehidupan Junjungan kita Muhammad *salla Allāhu 'alayhi wa sallam* di dalam rumah tangganya kelihatan serba indah, tak pernah beliau berlaku kasar terhadap isteri-isteri yang telah diberinya gelaran sebagai "*Ummahāt al-Mu'minīn*" – Ibu-ibu bagi Sekalian Mukminin – beliau mengharapkan segala tingkah laku dan gerak geri "*Ummahāt al-Mu'minīn*" di dalam rumah tangganya akan dijadikan contoh dan tauladan oleh ibu-ibu yang lain. Beliau telah mengutamakan dirinya supaya hidup aman tenteram di tengah-tengah kumpulan isteri-isterinya sebagai menumpahkan perasaan kasih sayang yang tidak berbelah bagi.

Kita pada hari ini telah dapat membaca riwayat-riwayat, kisah-kisah yang telah dicatat oleh ahli sejarah Islam tentang kehidupan Rasulullah *salla Allāhu 'alayhi wa sallam* di samping isteri-isterinya di dalam sebuah rumah tangga yang aman, rukun dan damai, dan kita akan tertarik hati melihat layanan secara adil dan sama rata yang telah diberikan oleh beliau terhadap isteri-isterinya itu. Walau bagaimana adilnya beliau melayani mereka, namun sekali-sekala timbul juga perasaan merajuk, sikap berlawan-lawanan serta cemburu di antara mereka sesama sendiri. Ini sebagaimana yang telah saya katakan tadi adalah sifat-sifat semula jadi yang ada pada setiap

Alam Wanita...

wanita dari sejak zaman dahulu hingga sekarang yang sangat sukar sekali hendak dihapuskan. Walau pun demikian seemuanya ini adalah beliau hadapi dengan perasaan hati yang sabar dan tenang. Ini tidaklah lain melainkan kerana Rasulullah *salla Allāhu 'alayhi wa sallam* adalah seorang manusia yang sempurna tabiat kejadiannya, yang mana dengan kebijaksanaannya beliau berjaya mententeramkan suasana rumah tangganya. Ini selain daripada pimpinan Allah yang sentiasa mengawasi dan mengawal setiap detik akan gerak-geri yang dilakukan oleh Rasulullah dalam masa menjalankan tugas besarnya terhadap rumah tangga dan perkembangan-perkembangan agama Islam yang diserunya.

Tugas-tugas *Ummahāt al-Mu'minīn*:

Sejarah Islam mengakui, bahawa isteri-isteri Nabi yang mulia itu, adalah sentiasa mencintai beliau dalam erti kata cinta yang sebenarnya. Oleh itu pada setiap masa dan waktu mereka selalu berada di samping beliau, siap sedia untuk menjalankan sesuatu tugas yang diperintahkan oleh beliau. Beliau sentiasa membawa mereka bersama ketika beliau bertugas keluar ke medan pertempuran menggempur musuh. Segala layanan yang mereka berikan bersama terhadap Rasul Allah adalah merupakan suatu bantuan bagi meringankan tanggungjawab beliau memikul bebanan tugas-tugas agama yang sebegini berat, sehingga beliau tahan menanggung penderitaan-penderitaan pahit dalam masa baginda menjalankan segala

tugas menegakkan agama Allah di dalam keadaan tenang dan terhibur. Begitulah di antara tugas-tugas besar yang telah diaksanakan oleh isteri-isteri Nabi “*Ummahāt al-Mu'minīn*” terhadap rumah tangga.

Dengan layanan-layanan yang sebegini meriah yang telah diberikan oleh isteri-isteri beliau, maka baginda Rasulullah sekalipun usianya telah meningkat enam puluh tahun masih kelihatan cekap dan cergas menjalankan urusan pemerintahan Islam. Sehingga dalam masa umurnya genap 63 tahun, beliau pun menghembuskan nafasnya yang terakhir berpindah ke alam baqa menunaikan seruan Illahi di atas pangkuhan salah seorang isteri yang sangat dikasih iaitu “*Ummu al-Mu'minīn*” Saiyidatina Aisyah binti Abi Bakar As-Siddiq *radīya Allahu 'anhuma*.

Diampuni Allah kiranya bagi mereka-mereka yang mengatakan bahawa Nabi Muhammad *salla Allāhu 'alayhi wa sallam* tidak berdebar hatinya dengan perasaan kasih kepada isterinya Saiyidatina Aisyah dan di atas mereka, yang menuduh bahawa beliau tidak tertarik hati kepada isterinya Saiyidatina Zainab binti Jahsy, dan perasaan kasih sayang itu tidak ada sangkut paut dengan perkahwinan beliau dengan isteri-isterinya itu.

Sangkaan atau tuduhan yang sedemikian itu adalah ditolak oleh Allah dan Rasul-Nya, dan tidak diterima oleh tabiat semula jadi dan diingkari oleh sejarah yang telah menampung segala kisah perihal hidup Nabi Muhammad di dalam rumah tangganya.

Bersambung.

* * *

sudah siap!

Siri Kesah

Tokoh2 Sejarah I

RUPA YANG BUROK

*Di-padankan dari che-
rita2 Sejarah Islam.*

*Didek-lah jiwa kanak2
dengan menggalakkan
mambacha buku2 se-
jarah ringkas Islam.*

*Di-jalin dengan baha-
sa yang mudah dan le-
kas di-sahami oleh
kanak2. Serta di-hiasi
dengan gambar2 lukisan
yang menarik.*

Sa-buah 40 sen.

Pos 10 sen.

Pesanlah kapada:

QALAM

8247 Jalan 225,

Petaling Jaya,

Selangor.

* * *